

晉

略

冊十

香

香

香

晉略彙傳一

宗室

宣帝兄弟八人兄朗弟孚愷恂進通敏

朗之後

朗魏志有傳初未有子孚子望嗣後生子遺魏昌武亭侯遺又無子復以望子洪爲嗣焉

義陽成王望字子初寬厚有孚風魏時官護軍加常侍與裴秀王沈鍾會並爲高貴鄉公所親待文帝擅政望不自安求出爲關中都督八年封順陽侯徵拜衛將軍領中領軍遷驃騎司徒中領軍如故泰始元年封義陽王三年遷太尉四年吳施績寇江夏統中軍屯龍陂寇退班師丁奉寇芍陂再赴之奉退代石苞爲大司馬七年吳主自向壽春望以中軍屯淮北寇退班師是年薨年六十七望性儉而好貨子四奕洪整楸奕官黃門侍郎先望卒奕子奇襲奇亦好貨坐遣

三部使至交廣貿易爲有司所奏太康九年貶三縱亭侯更以洪子章武王威襲威字景曜小字阿皮初襲父河間封咸寧三年改章武太康九年襲義陽凶暴無行詔附趙王倫元康末爲常侍倫篡使與黃門郎駱休逼奪璽綬遂爲倫中書令惠帝復阼告諸大臣曰阿皮捩吾指奪吾璽綬不可不殺威誅復立奇爲棘陽王河間平王洪字孔業望子嗣遺者也魏典農中郎將原武太守襄賁男泰始元年封咸寧二年薨二子威混威襲改封章武威繼義陽混襲章武官常侍薨京師陷混諸子皆沒胡唯少子潛初嗣新蔡者南還與太妃不協太興二年上疏言兄弟沒在遼東章武國絕宜還所生太妃訟之事下太常太常循議曰章武新蔡俱承一國之統義不得替其本宗而先旁親按潛已被命爲人後矣必須無復兄弟本國永絕然後得還所生今兄弟在遠不得言無宜詔遼東發遣令還潛今未得便委離所後也詔曰潛雖出養自有所生母新蔡太妃相待甚薄潛執意

如此如其不聽終當紛紜更爲不可今便順其所執還襲章武潛薨
子休襲與彭城王雄俱奔蘇峻爲峻戰死弟珍年八歲以小弗坐咸
和六年襲官大宗正薨無子河間王欽子範之襲官游擊大將軍薨
子秀襲義熙元年爲桂陽太守秀妃桓振之妹也振作逆秀不自安
謀反伏誅國除 整魏清泉亭侯先望卒武帝以義陽國之隨縣追
封爲王子邁襲太康九年以平林縣益邁封爲隨郡王 竟陵王浬
字孔偉泰始元年封東平王官尙書詔事楊駿駿敗坐死東安公繇
方用事素善浬救之得免遷大鴻臚加侍中未幾繇廢徙浬亦免歸
國多殖貨財奢僭踰制趙王倫篡署衛將軍倫敗免繇復爲僕射舉
浬鎮下邳加衛將軍再加車騎蕩陰之敗東海王越奔焉不納越兵
迎大駕懼解徐州讓越自表以車騎將軍都督兗州領刺史詔卽授
之刺史苟晞避位依范陽王虓浬徵斂無藝郡縣不堪命虓承制遣
晞還徙浬青州浬不受命與虓構兵兵敗還國光熙改元詣闕懷帝

卽位改封竟陵拜光祿大夫越出鎮其黨何倫橫京師琳白帝請討之帝許諾旣而不克帝委罪于琳琳奔竄得免越薨乃出京師陷爲亂兵所殺

孚之後

孚封安平王自有傳子九人邕望輔翼晃瓌衡珪景望出嗣朗

邕字子魁立爲安平世子官侍中步兵校尉先孚卒諡曰貞子三人崇隆承崇立爲世孫早卒承出嗣叔父翼泰始九年穆王隆襲咸寧三年薨無子國絕

太原成王輔魏野王太守泰始元年封渤海王咸寧三年改封太原官并州監軍太康五年薨子三人弘緝韓緝出嗣叔父珪韓出嗣叔父晃弘襲元康初官常侍改封中丘三年薨子鑠襲

翼字子世魏虎賁中郎將無子邕子承嗣泰始元年封南宮縣王薨子佑襲

下邳文獻王晃字子明泰始元年封孝友貞廉謙虛下士甚得宗室之傳九年出鎮成都以疾不行太康四年拜僕射出鎮臨淄惠帝卽位入爲車騎領護軍守尙令遷司空加侍中令如故元康六年薨子二人哀綽哀早卒綽有篤疾別封良城縣王兄輔子韓襲官尙書薨子韶襲

太原烈王瓌字子泉泰始元年封十年薨子顯襲咸寧三年改封河間在八王傳子三人訟出嗣高陽其二子史失名隨死新安詔以彭城王植子融嗣改封樂成縣王薨無子建興中以彭城王釋子欽嗣襲封樂成

高陽元王珪字子璋少有美譽泰始元年封出爲鄴督六年入朝以父老乞留供養拜尙書遷僕射十年薨無子太原王輔子哀王緝襲咸寧四年薨無子太康二年以太原王世子顥子訟嗣降封真定縣侯

常山孝王衡字子平魏駙馬都尉汝陽子泰始元年封二年薨無子
安平世子邕子敦襲

沛順王景字子文魏諫議大夫樂安亭侯泰始元年封咸寧元年薨
子韜襲

廆之後

廆魏魯相封東武城侯子三權泰綏

彭城穆王權字子興魏冗從僕射襲東武城侯泰始元年封出鎮鄴
咸寧元年薨子元王植襲官後將軍侍中尚書永康元年代淮南王
允鎮壽春未發允討趙王倫不克死或云植助允倫忌之以憂薨子
二人釋融融出後河間王顥康王釋襲官平南分魯之蕃薛益其國
薨子二人雄紘雄襲咸和初畔奔蘇峻峻平坐誅康王紘襲 紘字
偉德初封堂邑縣公元帝承制以繼高密王據官前將軍雄誅還襲
彭城有風疾免官下其國臣嚴加防錄咸康八年薨子二人玄俊俊

出嗣高密王略玄襲官中書侍郎薨子弘之襲薨子邵襲薨子崇之襲薨子緝之襲宋受禪國除

高密文獻王泰字子舒魏扶風太守陽亭侯泰始元年封隴西王官游擊將軍出爲兗州刺史遷鎮成都偁疾不行轉鄴長安入爲僕射又出鎮長安以疾還都永熙改元遷司空領太子太保加侍中給千兵百騎楚王瑋被收泰將救之祭酒丁綏諫乃止瑋誅錄尚書遷太尉守尚令改封高密元康九年薨泰廉靜遠聲色服膳如素士朝會在路莫知其爲王公事親謹居喪哀謙虛下物爲宗室儀表惟不能振施然以節制與下邳王晃並偁諸王莫及焉子四人越騰模略越別封東海騰出嗣叔父史失其名孝王略襲略有父風小心下士自常侍出鎮沔南遷臨淄逐青州刺史程牧自領刺史永興初劉伯根反略不能制走保聊城懷帝卽位遷鎮襄陽流民王適反討降之永嘉三年薨子據襲薨無子彭城王子紘襲後還本更以紘弟恭王俊襲俊

字道度官常侍薨子敬王純之襲官司農少府薨子二人恢之法蓮
法蓮出嗣高陽王文深恢之襲義熙末以給事中兼太尉修謁洛陽
諸陵宋受禪國除 東海孝獻王越初立爲隴西世子以功別封東
海在八王傳子毗官鎮軍沒于石勒元帝以子哀王冲襲永昌初官
中軍加常侍轉車騎驃騎咸寧七年薨無子成帝臨崩以子奕紹封
哀帝卽位奕徙琅邪國絕奕入纂大統被廢復爲東海王旣而貶海
西公國又絕隆安三年詔以元顯子彥璋紹封爲桓玄所害國除
新蔡武哀王騰初封東嬴公官太常出鎮晉陽建武改元與王浚攻
成都王穎于鄴穎棄鎮走懷帝卽位遷車騎鎮鄴改封新蔡王公師
藩汲桑寇鄴鄴中府庫空竭而騰私財甚饒吝不卹士事急賜人米
數升帛丈尺人不爲用棄城走爲賊將李豐所殺子四人虞矯紹確
虞有勇力逐豐豐投水死虞及矯紹並遇害莊王確襲遷鎮許昌永
嘉二年爲石勒所殺無子章武王混子潛嗣潛還本汝南王祐子弼

襲太興元年薨無子弼弟顓襲官侍中薨子二人晃崇晃襲官散騎侍郎爲桓溫所廢孝武時更以崇襲爲奴所害子惠襲宋受禪國除南陽王模字元表少好學有倂譽初封平昌公代成都王穎鎮鄴爲公師藩所攻丁紹苟晞救之得免遷鎮許昌進封南陽王永嘉初遷鎮關中饑疫盜起徵爲司空其謀臣淳于定曰關中天府霸王之資也今以不能見徵望實並損且公兄弟勑起大事迎還乘輿東海專朝公又入輔弱則受制強則生嫌非長策也模納其說不就徵而表其子保鎮上邽其年進太尉大都督京師陷模遣牙門趙染戍蒲阪染求馮翊太守弗得怒降劉聰率聰軍攻長安模使定拒之不勝入守糧匱降爲劉粲所殺子二人保黎黎出嗣范陽王虢保襲見索綝麴允傳

范陽康王綏字子都魏諫議大夫泰始元年封咸寧五年薨子虢嗣虢字武會少好學清辨能言自常侍尙書出鎮許昌惠帝自鄴還都

虢與東平王璆鎮東周馥上表欲協和顯越帝既入關又表欲保全成都自屯滎陽與模推越爲盟主共迎大駕越承制進虢驃騎將軍河北都督領豫州刺史與劉喬構兵卒敗喬帝還都拜司空是年薨無子南陽王模子黎嗣隨保遇害

恂之後

恂魏鴻臚丞子遂

濟南惠王遂字子伯魏冠軍將軍鄴督封祝阿伯泰始元年封明年薨子二人耽緝耽襲咸寧三年改封中山是年薨無子弟緝襲爲成都拒王浚戰死無子國除 勳字偉長咸和六年自關中歸朝自言恂之玄孫遂之曾孫失其祖名父瓘略陽太守年十餘歲長安陷沒于劉曜曜將令狐泥養以爲子云詔拜謁者僕射便弓馬能左右射以勇聞庾翼鎮襄陽代桓宣爲梁州初屯西城退守武當石虎死雍州豪帥來請兵勳出駱谷壁懸鉤遣部將劉煥攻長安斬將拔賀城

而還桓溫伐秦勳出子午屯女媧堡溫敗引還遷征虜將軍監關中軍領西戎校尉賜爵通吉亭侯爲政酷暴治中別駕言語忤意卽于坐梟斬或引弓自射西土患之溫務加綏懷拜其子康爲漢中太守興寧三年反于梁州入劍閣圍成都自僭梁益二州牧成都王明年兵敗爲朱序所獲傳首京師

進之後

進魏中郎子二人遜睦

譙剛王遜字子悌魏輕車將軍羽林左監涇陽男泰始元年封二年薨子二人隨永定王隨襲薨子邃襲沒于石勒元帝以閔王永襲承自有傳子烈王無忌襲薨子二人恬愔敬王恬襲薨子四人尙之恢之允之休之忠王尙之襲爲桓玄所害休之長子文思襲爲劉裕所廢國除無忌恬尙之文思並見休之傳愔字敬王封廣晉伯早卒無子兄恬子允之襲允之字季度歷輔國將軍吳宣城譙梁內史與尙

之恢之同拒桓玄尙之敗與恢之同徙廣州中道遇害義熙中以從弟康之子文惠襲宋受禪國除

高陽王睦字子友魏侍御史安平亭侯泰始元年封中山王自表乞依六蓼祀皋陶鄩杞祀相立廟事下太常博士劉惠等議睦非正統不得立太祖廟後世中山乃得爲睦立廟爲後世子孫之始祖耳詔曰禮文不明此制度大事宜令詳審可下禮官博議乃處當之咸寧三年坐招誘逋亡七百戶爲冀州刺史杜友所奏貶丹水縣侯太康改元詔復爵有司奏封江陽王詔封高陽元康元年詔爲宗正薨二子蔚彪彪出嗣叔父敏蔚早卒孫毅襲永嘉中沒于石勒隆安元年詔以譙王恬次子恢之子文深紹封薨無子更以高密王純之子法蓮紹封宋受禪國除

通之後

通魏司隸從事安城亭侯子三人陵順斌

任城景王陵字子山魏議郎泰始元年封北海王三年改封任城咸寧五年薨子濟襲官輔國將軍苦縣之敗爲石勒所殺

順字子思魏習陽亭侯武帝受禪順嘆曰事乖唐虞而假爲禪名遂悲泣由是廢黜徙姑臧順雖受罪流放守意不移竟卒徙所

西河繆王斌字子政魏中郎泰始元年封陳王三年改封西河咸寧四年薨子隱襲薨子香襲

敏之後

敏史闕其世高陽王睦子彪爲敏嗣孫彪見文學傳

宣帝諸子

宣帝九男穆張皇后生景帝文帝榦伏夫人生亮伯京駿張夫人生彤柏夫人生倫倫見八王傳無後

景帝之後

景帝見武紀無子以文帝子攸爲子封齊王自有傳子四人罔蕤贊

實難出嗣叔父定國贊實出嗣叔父廣德罔襲自有傳罔子三人超冰英罔之敗也三子皆被幽金墉永興初赦還第封超縣王光熙改元復本封京師陷三子皆沒胡太元中以故南頓王宗孫柔之紹封官常侍元興初爲桓玄所害子建之襲宋受禪國除

榦之後

平原王榦字子良魏撫軍中郎將定陶伯泰始元年封咸寧初遣諸王之國榦有篤疾特留京師太康末拜光祿大夫榦性理不恆而頗靜退雖王大國若不在己朝士造之或令立車馬于門外至終日不見時有見者則訓接恭遜初無闕失趙王倫擅政以爲衛將軍惠帝復阼加太保齊王罔入京師宗室朝士皆以牛酒相勞榦獨以百錢永嘉五年年八十薨會劉聰寇偪不遑贈諡子二人世子廣早卒次子永太熙中封安德縣公京師陷闔門遇難

亮之後

亮封汝南王自有傳子五人粹矩秉宗熙粹早卒

矩字延明立爲汝南世子官屯騎校尉與父同遇害追贈典軍將軍子威王祐襲祐字永猷永嘉末南度建武元年拜鎮軍太寧中進衛將軍咸和元年薨子恭王統襲坐南頓王宗事廢其後復封官祕書監薨子義襲薨子遵之襲義熙初梁州刺史劉稚謀反推遵之爲主事泄伏誅弟楷之之子蓮扶襲宋受禪國除

秉字延年太康末封西陽縣公亮之被害也秉年八歲鎮南裴楷與之婣親竊之以逃一夕八遷乃免楚王瑋誅進爵爲王官步兵校尉左軍驍騎將軍元康初進封郡王坐長沙王乂黨廢爲庶人光熙復封拜撫軍以汝南期思西陵益其國永嘉轉鎮軍領後軍復以邾蘄春益之隨東海王越出鎮遂度江元帝承制拜撫軍大將軍開府給千兵百騎太興中進太保錄尚書領大宗師進太宰王敦平又領太尉與王導庾亮並受遺詔輔成帝坐弟宗免官降封弋陽縣王蘇峻